

增修雲林寺志

增修雲林寺志卷四

檀越

崔育材仁和人官職方員外郎天聖九年捨鹽橋住

宅爲靈隱下院

見咸陽臨安志人物表

李衛字又玠徐州人仕至太子少保兵部尙書直隸

總督諡敏達公於雍正間開府兩浙多惠政去後

民多思之常捐捧倡修雲林大殿有募引載志中

張彙字容川華亭人官刑部郎中嘗捐金百兩爲諦

暉和尚造塔且爲之誌銘

汪應庚字上章號萬松歙人僑籍江都從事風沙之

業樂善好施其天性也如賑饑寒助昏喪修學舍  
贍貧士諸事不惜重費無不舉行

世宗憲皇帝嘉其行義

欽賜光祿少卿銜以褒異之庚申歲返新安遊雲林寺  
見棟宇將頽慨然修建壬戌秋日忽感微疾合掌  
西向而逝家人皆聞白旛檀香徧滿室中子四明  
守起克承父志捐金告竣

人物

李紳字公重無錫人中書令敬元曾孫號短李穆宗  
召爲翰林院學士與李德裕元稹同時號三俊武

宗時爲相居位四年出鎮淮南布衣時曾游靈隱  
天竺二寺有追昔遊詩

沈亞之字下賢吳興人第進士太和初官殿中侍御  
史有候仙亭詩

潘閔字逍遙大名人居錢塘人稱潘閔巷爲秦王府  
記室參軍秦王繼恩得罪下獄捕甚急閔遂髡爲  
僧而逃後事解授四門助教有宿靈隱寺詩

薛映字景陽蜀人進士及第累知制誥歷禮部尙書  
集賢院學士分司南京卒贈右僕射諡文恭有曲

水亭詩

王令字逢原廣陵人王介甫愛其才以吳夫人之妹妻之有遊靈隱寺詩

郭祥正字功父當塗人舉進士知武岡縣僉書保信軍節度判官以殿中丞致仕有錢塘百詠載靈隱山水古蹟甚夥

劉一止字行簡歸安人宣和三年進士紹興中官監察御史累遷給事中以直學士致仕有入靈隱寺詩

蘇庠字養直丹陽人有隱操號後湖居士有宿飛來峰下詩

李綱字伯紀邵武人登政和二年進士宣和中歷尙書右丞高宗卽位拜右僕射兼中書侍郎卒諡忠定有遊靈隱寺詩

周紫芝字少隱宣城人年六十一始登第歷官樞密院編修官自號竹坡居士有登北高峰詩

曹勳字公顯陽翟人以父恩補承信郎特命赴進士試登甲科顯仁太后北歸有迎鑾功歷昭信軍節度使加太尉卒有贈靈隱長老詩

周必大字子充廬陵人登紹興二十年進士召試館職累掌內外制歷左丞相拜少保益國公以少傅

致仕卒諡文忠有佛海園鑑二塔銘

范成大字致能吳郡人紹興二十四年進士累官吏  
部尙書參知政事以病乞閒進資政殿學士再領  
洞霄宮諡文穆有冷泉放水詩

樓鑰字大防鄞縣人隆興元年登第累遷中書舍人  
翰林學士同知樞密院事進參知政事卒贈少師  
諡宣獻有觀冷泉亭放水詩

姜夔字堯章鄱陽人布衣工詩慶元中上書乞正奉  
常雅樂得免解訖不第嘗寓居西湖有寄錫朴翁

靈隱詩

葛天民字無懷山陰人初爲僧名義銛字朴翁後返  
初服有泛舟入靈隱山詩

王埜字子文金華人登嘉定元年進士歷端明殿學  
士僉書樞密院事有登靈鷲新閣詩

高翥字九萬號菊磻餘姚人游江湖有詩名寓臨安  
最久有靈鷲詩

方岳字巨山號秋崖祁門人紹定五年進士仕至吏  
部尙書郎有避暑冷泉詩

趙師秀字紫芝號靈秀嘗登科旅寓湖山有冷泉夜  
坐詩



周密字公謹自號弁陽老人四水潛夫寶祐間爲義  
烏令入元不仕嘗居杭著武林舊事備載靈隱山

水事蹟

董嗣杲字靜傳杭人宋末棄官入道挂冠四聖觀著  
西湖百詠有冷泉亭香林洞諸作

王暉字仲謀衛州汲縣人中統初授中書省詳定官  
尋轉翰林修撰兼國子院編修至元五年拜監察  
御史多所論列權貴側目出爲平陽路判官進福  
建閩海按察使召至京師擢翰林院學士大德八  
年卒贈學士承旨追封太原郡公諡文定著秋澗

集有靈隱寺詩

曹伯啟字士開濟寧碭山人至元中薦除冀州教授累遷御史臺侍御史出廉訪浙西遂引年歸鄉人表所居爲曹公里天祿中拜陝西諸道行臺御史中丞辭疾不起士論高之卒贈河南行省左丞追封魯郡公諡文貞著漢泉漫稿有遊靈隱寺詩

傅若金字與礪新喻人家貧力學爲同郡范梈所知得其詩法以布衣至京師蜀郡虞集廣陽宋褰以異材薦佐使安南歸除廣州文學教授著清江集有題李遵道畫靈隱道中二杉圖詩

余闕字廷心唐兀氏世居武威徙家合肥登元統癸酉進士歷翰林待制至正十八年守安慶屢敗諸寇陳友諒合兵來攻城陷死之贈淮南江西北行中書省平章事封國公諡忠宣著青陽集有賦九里松詩

李孝光字季和樂清人至正七年詔徵隱士以秘書監著作郎召赴京召見於宣文閣明年陞文林郎秘書監丞卒於官著五峰集有靈隱十詠

張昱字光弼廬陵人左丞楊完者鎮江浙用才略參謀軍府事遷左右司員外郎行樞密院判官左丞

死棄官不出張士誠禮致之不屈張氏亡明太祖  
徵至京師閔其老口可閒矣厚賜遣還因自號可  
閒老人徜徉西湖山水間年八十三卒著廬陵集  
有冷泉觀猿詩

錢惟善字思復錢塘人領至正辛巳鄉薦官至副提  
舉張氏據吳退隱吳江之筒川又移居華亭明洪  
武初卒自號曲江居士著江月松風集有冷泉亭  
詩

凌雲翰字彥耕錢塘人元末蘭亭書院山長洪武初  
以薦授四川成都教授著柘軒集有冷泉猿嘯九

里雲松二詩

貝瓊字廷珮崇德人洪武初徵修元史除國子助教  
著清江集有靈隱十詠

高啟字季迪長州人洪武初召修元史授翰林院國  
史編修官擢戶部侍郎放還尋坐危法著缶鳴集  
有次靈隱復見心長老見寄詩

張羽字來儀溇陽人居湖州元末授安定書院山長  
明初徵爲太常司丞兼翰林院同掌文淵閣事以  
事竄嶺外未半道召還抵京投龍江死著靜居集  
有寄靈隱良泐二長老詩

馬洪字浩瀾號鶴窗錢塘人善詩賦清修苦節聲價益重嘗居九里松

陳贄字惟成餘姚人天順間官太常少卿致仕投老西湖嘗和董靜傳西湖百詠於靈鷲古蹟題詠殆遍

劉英字邦彥號賓山錢塘人景泰中郡邑交辟以母老辭著湖山詠錄有同沈石田諸賢遊冷泉詩

程敏政字克勤休寧人成化丙戌廷對第二授翰林編修累遷禮部右侍郎著篁墩集有公餞靈隱寺

詩

趙寬字栗夫吳江人成化辛丑進士官浙江提學副使著半江集有登韜光遇雨詩

沈周字啟南號石田長州人景泰中郡守以賢良應詔辭不赴嘗游湖上與劉邦彥徜徉靈鷲冷泉間傳有詩畫

史鑑字明古號西村吳江人嘗與沈啟南汝其通同游靈隱有詩

董濬字復宗海鹽人嘗從王陽明講學於姚江著從吾道人詩藁有韜光詩

徐禎卿字昌穀吳縣人弘治進士官國子監博士著

廸功集有靈隱寺贈靜公詩

邵經邦字仲德仁和人正德進士官刑部員外郎以  
嘉靖大禮建言廷杖發鎮海衛充軍著弘簡錄有  
飛來峰詩

田汝成字叔禾錢塘人嘉靖進士仕至廣東提學副  
使著西湖游覽志載靈隱寺事蹟甚詳

張時徹字唯靜鄞縣人嘉靖進士巡撫四川江西進  
兵部尚書著芝園集有北高峰詩

茅坤字順甫歸安人嘉靖進士任廣西按察僉事歷  
副使著白華樓集有訪响樓山房詩



徐渭字文長山陰人諸生入胡梅林幕府著櫻桃館

集有千佛閣詩

祝時泰字汝亨號九山閩人戶曹員外

高應冕字文中號穎湖仁和人光州太守

王寅字仲房號十嶽新安人庠士

劉子伯字安元號望湖仁和人庠士

方九敘字禹積號十洲錢塘人承天太守

童漢臣字仲良號南衡錢塘人江西憲副

沈仕字懋學號青門仁和人隱君

以上社友六人嘉靖間主西湖八社曰紫陽詩社

曰湖心詩社曰玉岑詩社曰月巖詩社曰南屏詩社曰紫雲詩社曰洞霄詩社其飛來詩社則靈隱寺三天竺九里松北高峰集慶寺普福寺石人嶺韜光澗西冷泉亭呼猿洞諸勝屬焉童南衡主之周詩字以言崑山人著虛巖集有靈隱寺詩

王穉登字百穀長洲人國子監生著客越集有冷泉亭詩

樊良樞字尚默進賢人萬厯進士歷官廣西右布政使著三山二酉等集有韜光菴詩

程嘉燧字孟陽休寧布衣僑居嘉定著松圓浪濤集

有北高峰九里松韜光諸詩

文震孟字文起長洲人天啟壬戌賜進士第一授翰林修撰以言事錮級崇禎初復官後以禮部左侍郎兼東閣大學士卒諡文肅著葑圃詩藁有韜光詩

姚思孝字永言江都人崇禎進士歷官大理少卿有峒巖山房詩

梁以樟字公狄錦衣衛人崇禎進士商邱令著印否集有登韜光詩

陳繼儒字仲醇華亭人著眉公全集有青蓮山房詩

黃道周字幼元漳州人天啟進士歷官坊局謫江西  
布政司都事被逮下詔獄遣戍福藩時進禮部尚  
書南京既下督師婺源死之著大滌函書浩然詠  
有韜光詩

陳子龍字人中更字臥子青浦人崇禎進士除惠州  
推官丁憂服除補紹興推官舉卓異天下第一陞  
吏部主事改兵科給事中乙酉死難著湘真閣諸  
藁有韜光詩

張遂辰字卿子錢塘人少穎異工詩文一游成均歸  
隱湖上晚以醫名游西山靈竺間詩甚夥

吳偉業字駿公太倉州人前明辛未榜眼入國朝

官國子監祭酒著梅村集有韜光詩

張綱孫字祖望錢塘人爲西泠十子之一著秦亭集

有靈隱寺詩

曹溶字潔躬秀水人前明進士國朝官少司農著

靜惕堂集有冷泉亭詩

周亮工字元亮祥符人前明進士國朝官少司農

著賴古堂集有韜光詩

王士禛字子底山東新城人順治進士官考功郎著

西樵集有韜光詩

朱彝尊字錫鬯秀水人康熙己未召試官翰林檢討  
著曝書亭集有松靄山房兩宿詩

嚴繩孫字蓀友無錫人召試官中允著秋水集有韜  
光詩

秦松齡字對巖無錫人順治進士召試官翰林著蒼  
峴山人集有韜光詩

潘耒字稼堂吳江人召試官檢討著遂初堂集有韜  
光詩

陳祚明字引倩仁和人著采菽堂集有冷泉亭詩  
吳農祥字星叟仁和人著澄觀堂集有斑衣園詩

趙吉士字天羽新安人官農部著寄園集有韜光詩  
厲士貞字烈士儀真人康熙進士有韜光詩

汪懋麟字季舟江都人康熙進士官比部著百尺梧  
桐閣集有冷泉亭詩

柏古字斯民華亭人有韜光詩

陸繁昭字拒石仁和人著善卷堂集有韜光詩

宋曹字射陵鹽城人官中書舍人有靈隱詩

徐延壽字存永閩人著尺木堂集有靈隱詩

湯右曾字西厓仁和人康熙進士官少宰翰林學士  
著懷清堂集有韜光詩

繆彤字歌起長洲人大魁官翰林有韜光詩

龔翔麟字天石仁和人官御史著田居集有石筍峰詩

王式丹字方若寶應人大魁官翰林著樓村集有韜光詩

查嗣璫字德尹海甯人康熙進士官翰林著查浦詩鈔有韜光詩

顧嗣立字俠君長洲人由進士官翰林著秀野堂集有雲林詩

沈元滄字麟洲仁和人官文昌令有韜光詩



吳焯字尺鳧錢塘人太學生著葑園集有冷泉亭詩  
沈廷瑞字樗厓宣城人眉生徵君之孫著東鄉集有

雲林詩

雲林寺志卷四終

增修雲林寺志卷五

藝文

重修靈鷲興聖寺記

宋樓 林

靈隱前天竺後名與天壤齊介兩山間一蘭若曰靈鷲寶石澗泉嵌空合流中分而兼有之考諸志實維晉理法師卓錫之始理咸和初自西天來見茲山而驚曰是中天竺國靈鷲山之小嶺不知何年飛來佛在世日多爲仙靈所隱今此亦復爾耶迺披荆棘廼闢梵廬地以人而顯至今巖以理名訪其塔猶在更厯表章至吳越尊尙至國朝駐蹕隱竺之價日增是

刹幾蕪廢不治猶齊魯之邾莒緇素愴焉聞於神臯  
嘉熙元年春妙選吳僧行果主之始至喟然曰吾少  
長茲境目擊而心憫之院無大小也人無古今也是  
山則前日之舊也吾其勉行之越明年作山門易向  
而南明年兩廡成又明年觀堂成位置合宜事可則  
而物皆可久也雅覩遂修丹碧奪日規畫一出其手  
內外備矣始欲築丈室建寶閣盡挹乎四山之秀不  
求諸人而聞者樂施不知其役而見者興敬於是靈  
鷲復粲粲余愛山水成癖坐冷泉憩香林屢嘗造其  
廬月異而歲不同難矣哉修鱗泳波茂樹當道徑窈

橋橫負使人意消於煙霏空翠之表吁顛而不扶危而不持聖門之所嘆孰謂浮屠氏其專如果哉果北峰暮年之法子兒事古雲晦崑迺其源已不凡兼而有常其心休休然士之寓者客而游者入出一待之以衣食察其色久不倦視其橐匪有餘此蓋有大過人者起廢細行也願力宏固有家法在遂書

重修靈隱寺記

明 張 瀚

吾杭白錢氏有國南宋建都兩山諸刹依然勝概其間救於先朝如虎林山之靈隱寺尤爲冠絕東晉咸和梵僧慧理建後析而兩之東靈鷲西靈隱宋景德

四年復合爲一啟覺皇殿彌勒閣高宗駐蹕數臨幸  
賜金額莊田以後興廢靡常迨洪武中住持惠明恢  
復如舊永樂初善才增塑三世金身宣德間災住持  
良玠重建隆慶三年復燬於雷火止餘直指一堂時  
海寇紛擾寺僧德明等圖復力不贍萬厯壬午陸司  
寇光祖知僧如通足任斯役令僧眾亟迎比至首築  
壇趺坐其上說楞嚴法華諸經遠邇諦聽罔不來助  
於是棟梁榱桷之材甃砌礫墁之石金牖丹堊之飾  
覆墊輒壁之需智士運謀壯夫輸力不三數年大覺  
殿巍然中峙就彌勒閣舊址爲藏殿後爲直指堂又

後爲方丈左爲妙應閣右爲選佛齋壯麗周匝雅飾  
莊嚴數十年瓦礫之場輪奐一新落成之日宜記其  
本末以垂永久僧眾相率詣余余遂次第其事系之  
銘

紫竹林記

國朝 陳元龍

杭州湖上諸山名勝甲天下而靈鷲峰爲最面峰卽  
古靈隱寺也

聖祖仁皇帝南巡

御書題曰雲林因遂稱雲林寺入寺稍折而西百餘步  
有三摩地焉曰紫竹林上接韜光下臨靈鷲蒼松左

時碧澗右繞桂竹交加翠陰茂密雲林之勝槩盡是  
矣中供大士像寶色莊嚴迥異諸相有禱焉輒應歷  
來住持皆清修苦行如古尊宿海內聞風而瞻禮者  
南自閩越北至燕齊不遠千里重趺裏禪始無虛日  
以大士之靈棲絕勝之境於是毘耶十笏之地爲雲  
林增重登紫竹林者如身遊佛國也元季楊廉夫遊  
靈隱寺詩有僧住梅檀紫竹林之句前明黃貞父李  
長蘅諸公亦嘗橫經于此蓋山川之靈秀佛乘之高  
深自古與文人學士結世外緣也予弱冠時奉先君  
子命率仲叔兩弟偕許時菴大宗伯俱以諸生鍵關

於此者數載親見仲野湖岷二禪師修葺整齊人天擁護之盛迨通籍居京師與山中遙隔者二十餘年旋以養親似歸曾一過之而二禪師已辭世仲野之徒超然克守清規禪板梵音肅焉如昔喜山門之不替留連憶舊者久之及予出撫粵西超然遠道來謁以重新殿宇告且屬爲之記予許之而未遑屬草也自後予再入國門出守

山陵歸參綸閣踪跡如雲顛毛似雪迴念讀書山中時甲子重新紫竹林之名勝眇乎若隔世矣今年春超然復貽書曰憶公與二先師結方外交時山僧以小



沙彌侍側今公壽逾八十山僧亦將七旬俯仰今昔  
一時主賓僧俗惟公山僧在耳紫竹林之蘭若與公  
似有宿緣可無一言以示後人乎予老矣退食之暇  
蒲團趺坐輒神遊于祇園甘露之境願以

聖恩深重未敢乞身形枯心瘁學殖荒落安能繼鐵崖  
黃李之後以文章翰墨留爲湖山佳話而追遡生平  
遊歷之處惟紫竹林夢寐不能忘則洵有宿緣未可  
知也異日者倘能蒙

恩放歸買艇湖頭與超然師扶杖同行結香火之社豈  
非予之大幸乎姑書此以俟之是爲記

重修雲林禪寺碑記

常安

兩浙聲名文物爭雄天下而名山巨浸亦甲秀東南  
唐宋之際蘭若琳宮巖坡堙谷其在錢塘者至一百  
二十七所而靈隱寺爲五山之一枕倚巖壑吐納煙  
雲敞麗幽覓真如所隲自晉咸和中僧慧理飛錫於  
此始建道場洊歷五季隋唐遞有興廢逮吳越武肅  
王敬禮延壽禪師恢宏雲構蓮界聿新南渡後高孝  
兩朝屢臨幸焉元末燬於火明洪武初主僧惠明光  
復如舊嗣此住持善財良玠德明如通等相繼興修  
迄乎季世龍象潛靈漸就頽落

國朝順治己丑具德和尚來主法席道風丕振學侶雲從遂乃廣締勝緣經營有十餘載千楹巖巖百拱穹窿雖曰重修其功實與開創者等康熙己己恭逢聖祖仁皇帝南巡

駐蹕茲寺

敕改今額

天章飛藻鷲嶺增輝其後

翠華四幸

宸翰屢頒又有金佛香檀之

賜而主僧諦暉亦蒙

寵錫誠異數也

今上皇帝御極念茲寺爲

聖祖臨幸之地

敕免本寺山場地蕩征稅若干使緇褐之徒得以定息  
繩床身心無擾蓋我

朝之加恩雲林者深且厚矣自具公以來更厯七十  
餘載不無摧剝今主僧巨濤爲諦公法嗣開法是山  
慨然以興復爲己任適光祿少卿廣陵汪君諱應庚  
字上章來遊武林一見契合大啟毘尼之壇度僧六  
百三十九眾旋捐淨財次第興修自大雄寶殿外爲

殿者五爲堂者十五爲閣者五爲軒者三爲樓者一  
爲亭者二爲寮者八他如玉樹林獅子窟塔院梅園  
以及庖福庫園之屬無不崇飾若夫繚以周垣固以  
層基鑄千僧之錫塑天龍八部及五百應眞之像此  
煥儼之見於寺內者而寺之外則藝塗以便遊侶築  
堰以蓄飛流凡合澗興隆之橋龍泓之洞鷺峰之徑  
咸作而新之有加於舊經始乾隆六年十月落成於  
九年十月費白金二萬兩有奇皆光祿君偕子震潛  
同爲喜捨而鳩工役財則巨公獨力所任也夫給孤  
長者以祇樹而布金波斯匿王以栴檀而刻像要皆

破虛至之慳證香身之果歲壬戌余奉

帝簡開府兩浙適當茲寺鼎新之會寶坊金容華棖  
玉砌與疊嶂秀峰輝映於翠微之表知其于過去劫  
中修無上慧未來劫中植無量福行見塗毒之鼓常  
鳴龍潭之燈永續幽祇協讚海岳崇瞻雖劫盡恆沙  
而淨業終以無毀矣工既竣巨公請予文爲記爰疏  
其顛末勒之翠珉以告來者

雲林寺重建輪藏殿記

鄭江

佛氏之有輪藏自梁傅大士始也嗣後叢林效之且  
徧天下俱供大士像於中雲林輪藏殿具公始建於

順治庚寅迄今幾及百年棟宇頽廢所爲輪藏者亦  
敲傾催剝而不能轉乾隆庚申新安光祿少卿汪君  
上章來游茲山慨然以重興爲已任而以是殿爲之  
首落成之日予適過寺見夫傑構翔空若地涌出入  
門神聳則如天樞激而地軸動月駕旋而風馭行瑤  
窗寶網眩金碧於無定天龍帝釋儼生氣以飛空徐  
而察之則集眾有力負之而趨且聆夫大聲起於足  
下又如良霄歌鐘之擊窟室袁氏鼓角之鳴地中偉  
矣哉象教之力宏矣檀護之施廣矣主僧巨濤和尚  
謁予文以爲記予惟傅氏之設輪藏轉經也然三藏

十二部卷帙繁而重度之於輪非數百人莫能轉今所供者諸佛菩薩像則數人能勝其任況轉佛卽轉經乎且佛氏所重者以心轉境不以境轉心故云能轉法華不爲法華轉若夫成住壞空大地山河皆太虛中一微塵耳何有於輪昔村婦薦夫財少而輪自轉則其能轉有不係於輪者惟此心之精誠歷劫常新亦歷劫常轉汪君之輪財巨公之集事可云轉大法輪將有不與土木丹青俱敝者矣於是乎書

梵香閣記

張燿

雲林漸山啟基神構暉煜飛楹繡栱布翼高驤大殿



東西隅齋堂後爲梵香閣順治丁酉具德法師重興  
茲寺所建雍正甲辰鬱攸弗戒歟焉堙毀乾隆壬戌  
住持巨公纂修堂宇新都汪光祿應庚誓願樹緣一  
切莊嚴爰及茲閣煥爾再新於是禪窟圓成遠近馳  
仰瞻層軒之聿崇悟離垢之妙諦矣夫法界眞靜斷  
滅五根宣芬散馥常參鼻觀諸天與人同止厭氛濁  
之上升和難各捨本任持旃檀而歸命故佛法中香  
爲佛事騰異香於波利則送風而聞表殊迹于龍池  
則撥沙而出無量無邊煙雲滿於十方非空非木根  
枝列夫二品若乃虔供養而塗身澄神慮而結願從

聞思修發戒定之秘份依定入慧證密圓之醜醜是  
則發明無漏熱一塵而具足豈必合境有異擣萬種  
而爲珍哉然起滅生乎現境沉水可作桑根之想淨  
名顯乎法相靈芬還升頂穴之中印度之女散花而  
禮讖普達之王傳芳而福應帝釋所摩石上猶餘郁  
烈兜婁所沐壇前頓爾猛熾要以心無染着多摩因  
之辭起體不受觸陀羅常在應身是故曼殊氤氳能  
使眾欲清涼伊蒲掩冉可除一切熱惱受牛頭之嘉  
產火不能然躡象藏之微薰疾不能害至如奉石鹽  
於兜率賚青棘於終南濡螺貝而卻敵燎薰陸而拒

邪西天印土縷縷成穗毘耶城邊馡馡滿鉢塵氣煖  
滅一鉢而普薰三千世界天樹開敷四布而周徧五  
十由旬斯皆耆山之廣運王舍之神機惟幻翳之全  
消乃融貫其眞理今巨師解脫知見作大德之苾芻  
光祿識精元明效伽羅之焚濯故能結此冥慈共成  
善果修櫛霄露共煙縷以浮空清風韻響偕天花而  
飄拂凡我道眾信翮高翔胸無滯疑乘香象而截流  
心有劑和置淨器而浴佛則茲閣之建洵乎功提無  
外也予居近名藍情皈禪慧眷言靈宇合讚修檀爰  
焚平等香息心了義而微妙典以記之

五百羅漢殿記

杭世駿

在昔涅槃經義謂有五百商人採寶出海值盜攘去并剗其目商日夜號痛欲向無所或告之曰靈鷲佛氏能救汝苦與我重寶引汝見之商且行且舍至大林精舍佛爲說法各證阿羅漢果夫所云阿羅漢者大論云阿羅名賊漢名破一切煩惱賊破復次阿羅漢一切漏盡故應得一切世間諸天人供養又阿名不羅漢名生後世中更不生是名阿羅漢法華疏云阿羅經云應真瑞應經云真人皆無生之義也或言名含三義無明糠脫後世田中不受生死果報故云

不生九十八使煩惱盡故名殺賊具智斷功德堪爲  
人天福田故言應供要而論之修六度之梵行標三  
乘之通號均爲超越凡倫優入聖域者矣後世寶  
琳宮偏閭浮提界然非名藍巨刹則五百應真之宇  
時或缺焉雲林向爲五山十刹之一百棋千櫨霞開  
鳥翥承雲繞雷虹拖蜿垂其西禪堂之下爲羅漢殿  
創于何朝未詳所自具德大和尚來主法席中興締  
構實建今處時順治戊戌也逮今乾隆癸亥八十餘  
年椶栢頽瘁法身雨立主僧巨濤慨焉憫睇廣募檀  
施精心建立幽祇協贊歛人汪光祿應庚獨獎勝緣

爲布金之須達一切興作咸委巨公於是百廢修舉而羅漢殿工未竣適光祿奄逝令子明州守起踵成之像設閑安四周列坐妙相莊嚴奕奕有生氣飛梁八維環楹交峙寶壇回互殿如田字之形俗因名曰田字殿吾杭梵宇以百數有此殿者惟淨慈雲林今淨慈悉已地頓而雲林金碧丹黝慈容統序東西向背毗接偶居嚴飾之工常留花窟夫佛不像法因垂像教故金姿寶相月面蓮眸皆無爲之寂不盡之靈之所託也今五百應真因苦願力普攝無邊散處山林分形顯化作人間福田亦所以示人從生有貪因

貪受苦因苦得報則凡見形而入道者於茲殿之興廢所係豈不重與殿旣成巨公乞言於予余肅瞻靈儀敷具頂禮契正覺之冥符儼法相之常住敬刊樂石而爲之記

清繞橋新建春淙亭記

厲鶚

清繞橋當鷲峰之陰跨北澗之上對理公巖之口橋舊無亭乾隆癸亥巨公重新雲林寺飭餘材賸斲成之登斯亭者仰挹山翠俯聽泉響炎曦陰霖有所芘而物色之奔赴若天造而神輸也巨公問名於予余以合澗橋舊有春淙亭蓋取蘇文忠兩澗春淙一壺

驚之句見貝廷臣清江文集中今亭廢久矣宜移其名於此巨公曰昔亭之澗合而今亭之澗分昔亭廢而名存今亭新而名舊天下推移起滅之幻有如是乎然其爲春淙則一也當夫天根見秋潦縮斯澗也若斷若續涓流如綫其聲滴瀝幽咽或有時而涸四顧林谷萬籟悄然此非君子之潛德未施而吾宗之憩寂入定時耶若夫土膏脈動山澤乃通斯澗也如風雨交作震動巖岫又如奏洞庭之樂五音繁會琤琤激盪自遠而近此非君子之乘時利見而吾宗之當機倡導時耶以是名斯亭也意深矣遂書以爲記



乾隆甲子春正月二十二日郡人厲鶚

蒲菴文集序

元 歐陽元

由唐至宋大覺璉公明教嵩公覺範洪公以雄詞妙  
論大弘其道於江湖之間一時老師宿儒若我先文  
忠公及韓琦蘇軾莫不歛衽嘆服皇元開國若天隱  
至公晦機照公倡興斯文於東南一洗咸淳之陋趙  
孟頫袁桷諸先輩委心而納交焉晦機之徒笑隱訢  
公尤爲雄傑其文太史虞集嘗序之矣訢公旣寂叢  
林莫不爲斯文之慨翰林修撰張翥棗示豫章見心  
復公所爲文以敏悟之姿超卓之才禪學之暇發爲

文辭抑揚頓挫開合變化藹乎若春雲之起於空也  
皎乎若秋月之印於江也邈而上之卓然並驅於嵩  
璉諸師無媿也

銅佛讚頌序

炬公住持  
靈隱

元  
釋天如

至正甲申夏錢塘照菴炬菩薩大會緇素於寶石山  
作佛事者四十八日以慶銅彌勒佛及觀音勢至像  
成亦以張其化使益廣而益遠也原其造像之始約  
化四十八人各施銅錢一而念佛千聲以爲例如是  
四十八人人各轉化四十八人遞遞轉化積四百八  
十萬錢治以範佛佛身長一丈六尺二大士稱之相

好纖悉具備既又梯山以登之營大殿以安奉之乃  
有今會於是四方士頌贊交集謂其可贊者有三錢  
唐佛刹巨細千萬計而未始有銅像一也募施之法  
取少而化廣異乎常二也合眾善以爲會高下之機  
普攝三也錄頌成卷待余序余於三者之外容有說  
焉初像之未成也全佛是銅及其既成也全銅是佛  
曰佛曰銅二名一體蓋佛不自佛從緣而生也緣  
生而類通之令悟世間萬物物皆佛也此外復有  
說焉凡一人一念之興一錢之施則其全體銅像已  
隨念而應之矣一念既爾念念亦然然則應念而成

之佛又何止四百八十萬哉此外猶有說焉以多人念佛之心展轉流布自今世後世以達乎無窮則佛隨而應之亦復如是而無窮也橫應之廣旣如是豎應之遠又如是其數量可思議哉是由照菴宗性具之學而得其旨將使人人同悟是心作佛是心是佛之說以至重重無盡互互無礙日理曰事周法界無一而非佛故其一機之發一像之成遂能致廣遠之化者如是以余知照菴之化如是故序其贊頌之卷如是

倡酬禪偈序

明  
徐一夔

偈者詩之類也佛說諸經必有重偈以伸其義觀於  
吾書春秋列國大夫之聘中國既修詞令以達事情  
未復舉詩明之蓋亦此類偈或五言七言惟便於誦  
讀而不叶以音韻詩多四言而以音韻叶蓋被之絃  
歌故也詩自漢變爲五言唐變爲七言頗嚴聲律爲  
釋氏者出言成偈大略亦近於詩吾鄉佐上人字東  
州處靈隱禪窟還台省親有密心嚴師者爲偈一首  
以贈其行其言七言其句八句詩之類也上人姿敏  
慧參扣直指其同袍之友慮其愛親之心不勝求道  
之志更相提擊斷振祖道而非世俗嘲風咏月之具

故不曰詩而曰偈上人徵余題辭因筆於首簡

送塏上人歸四明序

徐一夔

豫章復禪師唱道靈隱山中合儒釋以爲教從之者甚衆有塏上人者氣冲而守恬且有志於道事禪師有年將歸四明造門言別且請僧會予亦以被徵赴京師未暇執筆又介其師之友大淵禪師以爲言余謝之曰吾與上人所趨異塗所習異業今茲之別我方違親戚棄妻子以奔走於車塵馬足之間而上人之高踪峻跡如孤雲野鶴以翱翔於太虛之表其情又不同也其何以爲上人言哉然余聞之古先哲人

有深於佛者謂佛之道與易論語合其言非欺我也  
上人之師既合儒釋以爲教是宜不以我爲異而有  
所請也豈余知有未深乃反以爲異耶上人行矣四  
明雪竇層峰疊壁嶄絕空青傳聞異時多古佛化現  
上人歸臥雲壑益弘其道所造當益深余老且病得  
請而歸卽將絕濤江而東過上人之廬而叩其所以  
同者

韶光紀遊集序

國朝常安

西湖北峰之勝惟靈鷲最奇遊者至冷泉亭仰瞻林  
木下視流水憩息徘徊興盡而返不復知寺中西折

有曲澗縈紆層巒綿衍邃深幽寂之巢塢也巢塢有  
菴名韜光唐代宗時蜀僧韜光卓錫於此與郡守白  
公善往還酬答地以人傳而韜光之名以著迨後蘇  
子瞻趙闕道興寄煙霞題名崖石踵其遊者日盛昔  
人典型續而不墜自唐朱元明至我

朝天下名賢鉅公碩士高僧登臨憑弔撫景留題者  
多矣皆散漫無紀惟禪鐙一焰至今耿耿豈吾道之  
不若彼哉無人焉爲之彙而集之俾鴻篇藻句湮沒  
於古苔荒草中供山僧煮茗具耳婁東韻菴王太史  
西清學士東海名儒敦好古之雅懷輯人文之炳蔚



可謂收拾明珠還之合浦極一時之美事己丑歲予  
曾至浙一躋其巔垂今三十餘年宦遊四隅時遇浙  
之士大夫劇談韜光欣然神往壬戌春來蒞兩浙偶  
偕彭少司農石源尋幽討勝人竹逕循磻而西巖岫  
窈窕覓泉滴瀝白雲滿衣裾殊不知有人間世歎曰  
此真可以韜光矣啟窗眺江海始信駱丞樓觀門對  
之句爲不虛俯視四山排闥入檻飄飄乎如列子御  
風佳處任人自領而已因更得汲泉啜之縱觀所藏  
卷冊數十餘年來遊者咏者又若而人輯而藏之亦  
復哀然成集想當年白傅韜光同此樂趣遂賦詩一

篇付山僧翼附作者之林山僧復請弁集首是爲序

武林山辨

明邵重生

武林杭之名山因以名郡而古今皆朦朧未有直指  
的名爲某山者舊志以武林門右土阜俗稱祖山者  
當之爲其山先名虎林以避唐諱改稱武林成化志  
引楊正質虎林山記爲錢王時祖山在郭外有異虎  
其山自名虎非避諱也又引宋樓攻媿詩武林山出  
武林水靈隱後山無乃是且宋淳熙志明載武林山  
爲武林水所出安有又避唐諱之說決非城內無水  
小山明矣與薛公通志同惜偏而未全一統志列武

林山當矣下曰一名靈隱一名靈苑一名仙居乃以  
武林山飛來峰二山爲武林山是矣特認而未的至  
沙門契嵩武林山志與四水潛夫武林舊事直以飛  
來峰爲武林似矣又局而未廣近田公西湖遊覽志  
陳公萬厯志皆不列武林山而以靈隱山一名武林  
山豈惟齟齬不明而名言更不正今余爲辨者三以  
俟質之君子凡郡邑之著稱者必以郡中佳山水祖  
山蟻垤不足以當固矣特靈隱之名發於東晉先秦  
兩漢厥名伊何愚意凡謂之山者以其全體而言也  
高聳者曰山峰如脊者曰山嶺至岡陵正阜皆有分

別而一山字足以槩之故武林之名乃靈隱天竺諸峰之祖名也自慧理既來之後有飛來之名焉有靈隱之名焉有靈鷲之名焉有天竺而後有三竺之名焉至於蓮花佛國白雲白猿獅子香爐皆繼慧理發之而爲武林之支名至於南高北高五雲雙桂乳竇月桂諸名又後人濫觴也其曰形勝烏石靈苑仙居龍門楊梅西源善住興正瑞雲慶化集慶秦亭又土人之私諡也自有諸名而武林反以無專主而晦如子姓眾多而又著則祖父之名遠而晦久而亡此常道也如羅浮有七十二峰皆謂之羅浮山黃山有三

十六峰皆謂之黃山武夷有六十三峰皆謂之武夷山是可辨者一也羅處約靈隱碑曰浙水之右有山曰武林盧襄西征記杭地北環靈隱國朝楊太守開西湖疏曰杭州南跨吳山北兜武林觀前人之文曰右曰環曰兜三字則非一二山之指其可辨者二也且武林山者必當求武林水杭南北二山之水孰有大於三竺靈隱之溪乎南則從捫壁嶺水出嶺合雙桂永清月桂諸塢北從石人西源合白沙韜光諸塢正與舊志合曰武林山有二水南出者曰南澗北來者曰北澗若惟以靈隱寺山爲武林山則惟有北澗

而無南澗若惟以飛來峰爲武林山則飛來峰無水不出澗若以靈隱飛來二峰爲武林山則南澗從天竺諸峰來發源不全况舊志云西湖瀦武林山水秦時名武林水至漢方有金牛明聖之號南北二山凡有水流入湖者皆武林山其可辨者三也質高人之偉見稽形勝之現存吾於武林也奚疑

九里松說

國朝  
孫治

袁公仁敬之樹松也左右各三行行九里起行春橋至靈隱而止及下竺焉是爲九里松也萬厯志載九里松之見在者下竺路十一本靈隱集慶一百一十

九本共一百三十本邵虎菴之爲山志也相去十餘載所記行春橋至張家亭八本至黑觀音堂五十一本至飛翠亭七本至飛來峰二本迴龍橋至靈隱門十二本下竺路十本共九十一本其末年已亡其五余爲童子時猶見有二十餘本及於今日所存者不過十數本矣嗟乎松盡而九里又何有矣無其實者以名存之千載而下得與泰山五大夫並傳者則猶賴乎此耳

賜佛照禪師宸翰

宋孝宗

禪師所奏菩薩十地乃是修行漸次從凡入聖夫復

何疑方知腳踏實地十二時中曾無間斷以至圓熟  
雜染純淨俱成障礙任作止滅脫此禪病常如禪師  
之言當揮劍刃卓起脊梁發心精進猶恐退墮每思  
到處兢兢業業未嘗敢忘今俗人乃有以禪爲虛空  
以語爲戲論其不知道也如此茲事至大豈在筆下  
可窮也聊敘所得耳

靈隱觀老奉敕住天童疏

樓 鑰

海內名山最說天童法席禪林的派還須臨濟當家  
詔旨一頒人心俱響某神鋒峻發正令全提西湖水  
不抵辨口濶翻北高峰未如道行高聳一光一造都



成陳述三章三要正賴舉揚豈惟祖師粲可供作證  
明直得衣冠巢許同伸勸請呼猿洞口任他萬壑爭  
流宿鷲亭前便看一錫飛下

靈隱翻蓋僧堂疏

釋居簡

未除滲漏可容一日安居既已揭翻豈怕七間閒卻  
倘有帡幪之託遂無風雨之虞行住坐臥在其中哀  
君五福造次顛沛必於是還我三椽

靈鷲修造疏

釋居簡

千年箕裘得人則成住一日鐘鼓失度則壞空擬控  
衡三竺之雄冀復還兩晉之舊補苴罅漏首法堂巽

兩廊扶持顛危襟蓮峰帶雙澗便便惟謹爾誓將以  
就緒爲期憂憂其難哉豈敢言信緣而已

請印鐵牛住靈隱茶湯榜

釋居簡

玉虎何知先動山中消息雲龍早貢首膺天上平章  
價雖重於連城產獨珍於雙壁恭惟某寵光五葉一  
杯分萬象之甘彈壓羣英敷水劣諸方之勝方圓制  
度清白華滋笑瀉源春夢不到池塘眷老圃秋容尤  
高節操頰牙騰馥四河袞袞無邊襟袖生涼兩腋颺  
颺未已洞庭君子封下邳箕裘不墜洛誦孫父事副  
墨文采難藏試從師友淵源欲起烟霞沈痼恭惟某

攬雜毒海設醴奚爲開甘露門飲河而止直指單傳  
其來有自俱收並畜待用無遺薦醍醐一味之醇顯  
芝朮眾芳之助行精進定是上藥草起一生成佛於  
膏盲見善知識如優曇花慰千載得賢於季孟

靈隱修前後兩殿榜

釋居簡

入雲表利化成南度莊嚴倒影浮圖彈壓北高巍峭  
桂子從廣寒飄下蓮花自天竺飛來一龕長放光明  
誰名彌勒孰是彌勒兩地平分風月有是文殊卽非  
文殊欲策勳輪奐之餘忍袖手顛危之際扶持得起  
同享泰山磐石之安蓋發將來遂有陵雨震風之託

韜光菴修造榜

釋居簡

喚韜光歸舊隱安用草北山之移思白傅詠甘棠尙  
可明南國之教花偈曾煩招隱白鷗終不寒盟排闥  
送青來知何日了問春從此去更幾時回宜速加鞭  
未堪勒駕把茅欲墮隻力奚爲萬間倘遂帡幪一盞  
盡歌藜藿飯猿臺畔起四三橡栗之翁布地園中須  
百萬撈補之手

淨慈瀨翁住靈隱方外交疏

元釋天如

惠遠送修靜過虎溪神交方外妙喜招子韶來徑塢  
機契室中悠悠古人實勞我思濟濟多士復見此老

某人通身手眼貼骨爪牙斥宗教似是之非得佛心  
不傳之妙一筆萬言雄辨仲靈覺範愕爾於前五年  
三跨大方寶掌永明瞠乎其後別利器於盤錯先鞭  
策以馳驅登見山堂誦東澗詩修乃祖盛時之舊好  
掬冷泉水洗許由耳振先民絕世之高風三轉法輪  
一貫吾道

石賦

飛來講徒聚石作供爲之賦

釋居簡

石奇而怪兮有惜不惜  
眠人兮猶人眠石夫二三子  
悠然會心攀高陟遐隱  
搜細尋捫蘿鳥輕籟雲景沉  
俯闕欽欹側行岑崟磅礴巖阿  
裴回礧陰洗濯雨蝕

摩挲薛侵獸駭始蹲鸞回欲升介如其質鏘乎其音  
如考琮璜如擊球琳如獲大貝如致南金室邇兮其  
何能及石遠兮輦無備直屹如林兮若拱而揖百夫  
晚兮無用其力若夫坡陁兮盤峭峙兮桓王佐才可  
就而不可致權奇兮巧玲瓏兮小市鄽隱可致而不  
可馬俯疏簷而巍插挂綺疏而環植立中不倚凜姿  
淡如卻步欲前偃僂反趨匪卑媿尊匪親簡疏匪璞  
貴雕匪瘠貴腴蔭之以綠蕉密葉之涼友之以青琅  
方寸之虛澤之以金莖沆漑之清鐫之以石鼓斷缺  
之餘堅不可鐫頑可澤與將爲魯叟之堅乎抑爲瞽

叟之頑乎哉或曰是石也皆有飛來之一體始焉飛來終焉飛去固蕩誕謾給兮不可復據夜半有力者負之而趨吾恐昧者不知兮防之不預因作而言曰小子識之庶乎一得兮有補千慮

靈隱釋寶達傳贊

宋釋贊寧

印沙牀者何通曰有道之士居山必非寶器疑其範築江沙巧成坐榻歟照佛鑑者何通曰卽鑑燈耳以其陸鴻漸貞元中多游是山述記記達師節儉而明心之調度也

靈隱千佛贊

宋理宗

一佛不二千佛奚別如處處水現在在月無去無來  
不生不滅梅花開時前村深雪

永明壽禪師畫像贊

釋居簡

客吟燈殘猿嘯月落納帔蒙頭千巖萬壑指破凡夫  
爲等覺妙覺齊大小乘於錢索井索縱大辨于談笑  
寄虛懷於冥莫所謂百軸宗境之文如泰山之一毫  
芒巍巍堂堂煒煒煌煌非心亦非佛破鏡不重光

嵩禪師贊

宋釋惠洪

歐陽之學宗師於世其徒喧闐攻我以喙童首儒林  
氣索力屈公於是時粹然一出天縱之辨武庫縱橫



璜璣捍我如護目睛義如串肉理如析薪一時名舉  
聳動縉紳世尊舉身毛孔俱笑如公語言筆下皆妙  
六物不壞未易致詰豈其踐履明驗之力宗教之衰  
河壞山摧冠巾縮衲其寒如灰拂拭塵翳見冰雪容  
拜起而喟涕落無從

長老端裕真贊

宋 孫 覲

龜指牀鵲巢肩鶉百結芋火然貌堂堂人中天師子  
吼遍大千

杲和尚畫讚

宋 王庭珪

碑碑硤硤如祝融太華高不知其幾千丈軒軒轟轟

如驚雷唳鶴聲徹乎九天之上道在真空空卽無相  
以相求之如盲摸象乘機應物河嶽震響眼如掣電  
舌如奔浪轉大法輪說無盡藏當恁麼時有識之者  
箇是徑山和尚

大慧禪師眞贊

宋 陸 游

平生嫌遮老子說法口巴巴地若是靈利阿師參取  
畫底妙喜

佛照禪師眞贊

陸 游

名動三朝話行四海撒手歸來雲山不改人言大覺  
同龕師云老僧掩彩

龍安住僧仁遠出德光頂相求贊 周必大

靈隱山前口說喃喃龍安寺前日視耽耽彼一此一  
前三後三語息則默學人更參

夢觀法師遺像贊

元 釋溥洽

右街三考左街昇跨朗籠基只一僧遍界光明藏不  
得又分京浙千燈

跋佛智與升菴書

宋 陸 游

此一編佛智禪師與其法子寒巖升公書也議論超  
卓殆非世所及三復嘆仰淳熙己亥三月九日建安  
雙清堂書

跋德光與梁世昌頌

周必大

大慧禪師住世時杜撰長老人人謂得其道今四十年電滅無餘惟佛照禪師眞朴實頭之的嗣旣壽且康續佛慧命微斯人吾誰與歸梁光遠得此頌藏之二十年若識本來面目是名參禪不然予復贅名故紙之後是結兩重公案也嘉泰壬戌八月

題癡絕禪師書山谷煎茶賦後

元釋大訢

魯直謫居瀘戎雖瀕九死而怡然自得效蜀人法事茗飲愛其風致作賦紀之後百餘年當宋季淳祐間蜀阻兵革癡絕禪師蜀人也思歸其鄉而不得讀魯

直賦悲之書以寄所感焉由涪祐距今今皇元天厯改元之秋又八十六年矣而蜀再罹兵亂比喜服順然不無傷殘也予雖非蜀人觀癡絕所書能無感慨佛言世界眾生悉由宿業流轉惟有道者持以定慧之力能安行而順適彼外之貧富夷險無一毫加損於我也魯直知道故謫居異土如享廊廟鐘鼎之樂癡絕悲蜀禍之慘知宿業之不可逃惟修定慧足以勝之然則作賦與所書爲後世貴重者以其道也金華樞要堂篤志於道得而甚秘惜之或者玩其詞之超勝而議其書之工拙者無取

題趙孟頫書靈隱寺碑

明方孝孺

天地間至堅固者莫如金玉木石脆薄者莫如簡筆  
縑紙礧石攻木範金植土以成室其成也難其傳也  
宜其可久操筆書紙率然而成文非假金石以刻之  
宜其易毀滅也然而世之爲堅固之具者常託其傳  
於易毀之物則豈其所託之人爲足恃耶錢塘佛寺  
最鉅麗者曰靈隱寺當元皇慶壬子改而新作之距  
今洪武癸酉僅越八十二春秋求其一椽一瓦皆已  
燬燎無遺而金華石塘胡公及吳興趙文敏公所撰  
而書之文述寺之創始與其山水之勝棟宇之麗僅

盈尺之紙耳誦而觀之當時之事猶儼乎如在則夫天下之可恃以永久者果安屬哉亦可慨然而有感矣石塘在元位最不顯而行最篤文最奇趙公名重宦高每得其文必欣然爲之書於是又可見苟有足恃固不以外物爲重輕而二公之過乎人必有出乎文詞翰墨之外而世之尊二公者方拘拘然求之于此而不知求之於彼不亦重可感夫翰林修撰練君子寧以此卷示予子寧多學而甚文必以予言爲然

募修雲林寺引

國朝  
李衛

嘗聞佛教之興由於西域寶刹之建盛於西湖蓋秀

氣乃結名都而異境多歸淨土如雲林者創由晉代  
廓自熙朝海負江環入擅東南勝槩山奇水冷素  
稱吳越禪宗飛來鷲嶺之峰俗塵難到散下蟾宮之  
子佳話常留伏念

聖祖仁皇帝幸浙省方每荷

翠華暫駐研雲染墨曾叨

御筆親題香靄重其氤氳瑞照增其朗耀近因蓮臺歲  
久蘭若年深燦爛焚燎漸被黽黽剝落崔巍殿宇旋  
驚風雨飄搖維茲名勝之區可無中興之侶迺有住  
持智廣者虔思補葺立願增修將用舊基以維新永



護

宸章於歷久但頽垣廢瓦早須布施之金綺井丹楹端  
賴發心之士用是弘祈檀越廣種福田多寡隨緣工  
程計日高僧勸善諒非藉此營私君子平施或可因  
而成事

靈隱寺題名

朱彝尊

靈隱寺晉咸和初沙門慧理建前有飛來峰理公巖  
冷泉經其下西出合澗橋分流入僧房叢篠中巖上  
下多鐫佛像土俗相傳謂是元僧楊璉眞伽所鑿蓋  
本於夏時正府志非也象教自漢孝明帝時流入中

國終漢之世凡宇內墓門石闕刻鏤先聖賢孝子烈女未有鐫及佛像者至晉始有之潛說友撰臨安志在宋咸淳年此時楊璉真誦未至浙中行省志中載寺有梁簡文帝石像記又據陸羽靈隱寺記稱理公巖慧理宴息其下後有僧於巖下周迴鐫小羅漢佛菩薩像然則飛來峰石像唐以前已有之審視厥狀戍削奇古望而知爲六代遺跡今煙霞洞羅漢六石屋羅漢一百一十六要非吳越以後工人所鑿土俗流傳之謬由未見咸淳志爾康熙辛巳三月同遊長洲顧嗣立俠君秀水朱彝尊錫鬯杭州馮念祖文子

吳陳琰寶厓顧之珽搢玉周崧層巖期而不至者蕭  
山毛奇齡大可也

故靈隱普慈大師塔銘 并序 宋 釋契嵩

法師諱幼旻信陽玉山人也本姓葉氏童時卽有出  
族之意告父母得命遂入其邑之興教蘭若師僧省  
覃出家旣納戒乃訪道四方來虎林見惠明禪師顏  
然有道器卽服膺執弟子禮盡學其法法務無難易  
者備嘗之矣久之惠明命師監其寺事未幾會其寺  
大火蕩盡方根其所失其同事者危之皆憂及禍師  
謂之曰我總寺事畢盡在我吾獨當之爾曹不必懼

也吏果不入寺問師第坐其起覺者耳此豈古所謂  
臨難無苟免者耶其後惠明告終畢其喪師卽帥眾  
白本府請大長老惠照公鎮其寺以繼惠明所統仍  
以監寺輔之戮力相與復其寺不十年而葺屋廬疑  
然千餘間益偉其舊慶厯中朝廷用其薦而錫之章  
服其後又賜號普慈及惠照謝世師方大疾亦力疾  
治其喪事始惠照垂終遺書舉師自代官疑其事不  
與以靈隱更命僧主之師事其僧愈恭無毫髮鄙悒  
心見于聲彩而人益德之當此知府龍圖季公知之  
乃以上天竺精舍命師以長老居之及觀文孫公初

以資政大學士蒞杭特遷之主靈隱始其演法之日  
孫公大帥衣冠貴游不翅百人預會爇香聽其所說  
而道俗老少貴賤摩肩而趨來者萬計是日人聲馬  
跡溢滿山谷法席之盛其如此者鮮矣師天性寬平  
慈恕與人周而多容而人亦頗美之故居其寺方六  
年寺益修潔益靖度弟子二十三人嘉祐乙亥仲冬  
初忽感微疾而臥先終一日與蒙語將授寺與今知  
禪德語氣詳正如平不衰十三日雞鳴起漱洗問時  
辰乃安坐而盡世壽六十一僧臘四十一以是月二  
十九日入塔于呼猿洞之直北寺垣之內塔已知師

以其行狀求蒙文而銘之然在古高僧傳其法凡吾人於其教有德有賢及其有功者乃得書之若今靈隱最天下名寺固我佛法倚之張弛也嗚呼普慈于其寺平生如此之效豈不曰于法有功乎予故不讓乃引其事而書之也銘曰惟功在法惟德在法法旣不生其勝緣豈有熄耶惟師之盛善常然不泯不墜斷可見矣

靈隱佛海禪師遠公塔銘

宋 周必大

師姓彭氏名慧遠眉山人先世儒業父寧母宋氏師年十三因其兄從釋氏問曰欲何爲乎兄曰求解脫

耳師曰然則我可爲也願與兄偕父母許之事藥師院僧宗辨問質所疑辨察其異語之曰吾不用汝侍奉也其往參叢林度有成而歸吾猶未老也卽祝髮走成都習經論學於大慈寺留四年乃遊諸方叩請甚眾復還峨嵋靈巖寺依黃龍南公之孫徽禪師兩歲若有所悟徽可之翼日卽告行同志挽留不聽曰師以爲可而吾終未釋然也聞圓悟勤禪師住成都昭覺造焉一日圓悟普說師豁然有得仆於眾中眾掖起之乃曰吾夢覺矣至暮與圓悟問答無滯圓悟大喜以偈贈師有奮鐵舌轉關捩之語眾目爲鐵

舌遠自此機鋒峻發常屈其上首紹興乙卯春眉守  
延居象耳山不赴是歲圓悟去世嘆曰哲人云亡繼  
之者誰乎迺扁舟下峽初抵淮南住龍蟠山壽聖寺  
一年遷琅琊山之開化又移婺之普濟侍郎蘇伯充  
一代耆德日與師談論俄徙衢之定業時妙喜杲公  
謫梅州有傳師偈頌往者妙喜駭曰老師暮年有子  
如此因以書寄法衣逮其歸相遇甚懽妙喜極口稱  
譽之自是人益歸重俄徙光孝閱十年安定郡王趙  
表之侍郎曾天猷俱爲世外交後過南嶽住南臺有  
龍玉璣方廣行皆月菴高弟道行湖湘竊謂曰此間



壁立萬仞遠將何所置足乎及聞其議論超詣始大  
嘆服連率其屬環拜曰此膝不屈於人久矣未幾過  
天台歷住護國國清鴻福三寺乾道丁亥沈尙書德  
和守平江以虎邱比不得人力邀師至則接物利生  
無倦戶外屢滿緇素悅服名達闕下五年有詔住皋  
亭山崇先寺六年遂開堂於靈隱賜號佛海禪師惟  
聖上神曜道得虛心應物屢召師入內相與問答而  
其道益尊明年夏有日本僧覺阿通天台教乘願工  
書能道諸國語初來謁師氣甚銳師徐以禪宗曉之  
覺阿留三年作投機五頌而去他日因海商附其國

園城寺主者覺忠詩書來謝其爲遠人所敬如此淳熙三年閏九月旦師上堂說偈數十句末云相喚相呼歸去來上元定是正月半都下喧傳而疑之師有弟曉林亦出家且得法於師方住國清至是招以來若有所屬明年感微疾果以上元安坐而化龕留十日顏色不變是月二十五日葬烏峰之塔壽七十四僧臘五十九後事實林主之傳其道又有了宣齊已了乘師玉靖紹鴻如本尼法眞皆住大利云某始識師於虎邱晚乃見之靈隱愛其辨而有宗峻而能通故樂與之語師旣葬而林數以銘爲請且曰吾師遺

言也久之乃爲銘曰

禪有頓門 無言爲宗 世或待喻 假言以通

惟其善鳴 譬如雷風 言而非言 以開羣聾

猗歟遠師 心傳大雄 如應響谷 如待問鐘

既得其承 龍象影從 明詔再錫 又彰其逢

發明正宗 摧折妄庸 法席屢遷 道契九重

於古有光 爲譽益崇 順緣而歸 自昔所同

明月攝彩 浮雲無踪 我爲銘詩 刻劃太空

於彼戲論 記其初終

圓鑑塔銘

法不孤起道不虛行續佛慧命必有其人其人謂誰  
佛照禪師其人是已師諱德光姓彭氏臨江軍新喻  
縣人曾祖崇善祖堯訓父術皆樂施喜釋氏嘗籍鄉  
里貧戶計日給錢宣和辛丑歲母袁氏夢異僧入室  
有孕生師骨相奇麗伏犀貫腦袁州木平山有妙應  
大師伯革者善相謂此子他日空門梁棟也初小入  
學讀書十行俱下父母繼亡依伯父循以居一日延  
僧追修師視佛書若素習然紹興辛酉大悲禪師宗  
杲南遷過邑師年二十一望見曰此古佛也吾安得  
事之自是有意出家後二年師拾光禪院受業爲足

菴普吉研究宗旨日以精進吉還闕命從月菴善果  
於東禪服勤三年是時妙湛佛心圓覺乾元越山諸  
禪利名僧相望師一一咨叩聞江西百丈道震嚴冷  
寶峰擇明峭拔俱入其室一日見饒州天寧應菴曇  
華送化主頌歎曰此眞臨濟種草亟往依之雖箭鋒  
相直然礙膺未決復從果老于馮山果入寂還江西  
謁典牛天游於雲嵒見萬菴道顏于圓通會曇華移  
廬山之東林葵之雙林師皆從之丙子歲聞大慧住  
四明阿育山喜曰緣法在茲矣已而果大徹慧示以  
贊略曰有德必有光其光無間隔名實要相稱非青

黃赤白慧歸徑山明月一堂師奉事益虔遇其說法  
坐下爭執筆鈔錄一歷耳根終身不忘有聞輒舉其  
慧解蓋天資也慧入塔分坐仰山乾道丁亥台守李  
侍郎浩延住鴻福閱五年徙孝光郡城大火寺亦焚  
蕩師念災餘財施必艱航海過泉州入境喜捨厚載  
而歸殿宇一新師自號拙菴曰我平生多得拙力孝  
宗皇帝雅聞其名淳熙三年詔開堂靈隱寺遣中使  
賜金是冬召入觀堂留五晝夜數問佛法大意師敷  
奏直捷上大悅賜佛照禪師之號贈以御頌明年再  
對進宗門直指以都下勞應接丐閑山林七年夏上

用仁宗待大覺禪師懷德故事亦以育王處之逮移御重華趨令入覲漏下十刻乃退紹熙四年改蒞徑山師力辭孝宗曰欲時相見耳慶元元年許還育王歸老東菴盡鬻錫資物直數萬緡置田歲增穀五千石助常住費詳見陸待制游記中師常曰佛經有大報恩七篇謂釋子當由孝以竭其力乃卽水陸堂東偏設位歲時祀其祖禰云嘉泰三年仲春忽語云我將行矣三月十七日手寫遺表及遺書常所厚者二十日晨興集眾敘別斂衣收足說偈而逝三日入龕容貌如坐塔全身于東菴之後請諡于朝敕特賜普

慧宗覺大禪師塔名園鑑僧臘六十夏嗣法者遍滿  
四方得度者一百二十餘人名公貴卿多從師遊海  
東國人往往望風歸敬初璉六十歲自汴京來育王  
壽八十三師始終適同茲其異也八月侍者正瓊持  
遺書來謂先師與公幸接鄉隣同受阜陵異知以塔  
銘見屬其行述則同里兵部章侍郎穎爲之予聞時  
節因緣鐵芥啐啄從上諸聖不能強爲喻筏刻刻徒  
增我慢又况對御法語世已流布得道源流接物機  
要叢林門弟各存語錄姑敘住世大畧如此銘曰

我聞萬生各具佛性人有未見或見未盡



偉哉光公 宿習戒定 賴入悟門 遂傳心印

福慧兩足 行解兼進 巍巍孝宗 見聖由聖

與師晤言 謂發深省 晚歸東菴 不倦接引

八十三年 報緣已竟 勿云明鏡 昔見今隱

一物本無 何用照映 勿云空谷 有叩誰應

十方皆空 何論銷殞 摘葉拈花 繫風補影

持問塔中 解顏微哂

松源禪師塔銘

陸游

松源禪師名崇岳生于處州龍泉之松源吳氏故因以自號自幼時已卓犖不羣處羣兒中未嘗嬉宕稍

長聞出世法慕向之年二十三棄家衣掃塔服受五  
戒於天明寺首造靈石妙禪師繼見大慧杲禪師於  
徑山久之大慧陞堂稱蔣山應菴華公爲人徑捷師  
聞之不待旦而行旣至入室未契退愈自奮勵中夜  
自舉狗子無佛性話豁然有得卽以扣應菴應菴舉  
世尊有密語伽葉不復藏師云鈍置和尚應菴厲聲  
一喝自是朝夕咨請應菴大喜以爲法器說偈勸使  
祝髮棟梁我道隆興三年師始得度於臨安西湖白  
蓮精舍自是徧歷浙江諸大老之門罕當其意乃浮  
海入閩見乾元木菴永禪師一日辭木菴欲往黃檗

木菴舉有句無句如藤倚樹師云裂破木菴云琅琊道一堆爛柴聾師云矢上加尖如是應酬數反木菴云老兄下語老僧不過如此祇是未在他日佛柄在手爲人不得驗人不得師云爲人者使博地凡夫一超入聖域固難矣驗人者打向面前過不待開口已知渠骨髓何難之有木菴舉手云明明向汝道開口不在舌頭上後當自知逾年見密菴于衢之西山隨問卽答密菴微笑曰黃楊禪爾師切于明道至忘寢食密菴移住蔣山華藏徑山皆從之一日密菴入室次問傍僧不是心不是佛不是物師侍側豁然大悟乃

云今日方會木菴道開口不在口頭上自是機辨縱橫不可觸木菴遠靈隱遂命師爲堂中第一座旋出世于平江澄照爲密菴嗣遷江陰之光孝無爲之治父饒之薦福明之香山平江之虎邱天下名山惟治父最寂寞又以火廢師一臨之四方名納踵至棟宇亦大興人謂師能使所居山大慶元丁巳年適靈隱虛席僉曰安得岳公來乎果被旨以昇師驩聲如潮居六年道盛行得法者眾法席爲一時冠而師有棲隱之志卽上章乞罷住持事上察其誠許之退居東菴俄屬微疾猶不少廢倡道忽垂一則語以驗學者

曰有力量人爲甚麼擡腳不起開口不在舌頭上又  
貽書嗣法山光光睦雲居善開傳以大法因書偈曰  
來無所來去無所去瞥轉元關佛祖罔措跏趺示寂  
實嘉泰二年八月四日得年七十有一坐夏四十奉  
全身塔於北高峰之原塔成之四年香山遣其侍者  
道孚以銘屬某某方謝事居鏡湖上年過八十病臥  
一榻得書不覺起立曰亡友臨川李德遠浩實聞道  
於應菴蓋與密菴同參李德遠每與某談參問悟入  
時機緣言句率常達且今讀師語峻峭齒舉下臨雲  
雨如立千仞之華山蹴天駕空駭心眩目如錢塘海

門之濤虎豹股栗屋瓦震動如漢昆陽之戰追思德  
遠所言然知師真臨濟正宗應菴密菴之眞子孫也  
銘曰

臨濟一宗先佛正傳應菴父子以一口吞金圈栗蓬  
晚授松源松源初心論劫參禪于一笑中疾雷破山  
坐入道場眾於濤濶金鏃脫手碎首裂肝彼昏何知  
萬里鐵關後十大劫摧山湮川法力所持此塔巋然

靈隱悅堂禪師塔銘

元黃潛

至大元年七月二十四日靈隱四十八代悅堂禪師  
告寂于丈室遺戒送終如常僧勿循故事建塔仍不

得用世間法服衰麻之衣既爲書徧別交遊及其法嗣遂書偈曰緣會而來緣散而去撞倒須彌虛空獨露置筆右脇而臥入于涅槃龕留七日顏色不變天方連雨闍維之日霽色朗然灰燼中得五色舍利大如菽其徒相與謀以爲師之光明俊偉如此雖治命不可違然不宜無以表人天之瞻依慰四眾之推慕靈隱所度弟子希清既捐私財造塔且置田若干畝歲度僧一人爲永久計而未有以昭示來者塔成後三十有七年希清及希白等若干人以狀來謁銘按狀師諱祖問自號悅堂族南康周氏母夜夢一老僧

來借宿既覺而孕師遂以生宋端平元年八月一日也師幼不茹葷骨氣清偉家故業儒七歲就學殊非其志年十有三母病危甚禱于觀世音大士而剖股和藥以進病隨愈母以其與佛有緣乃語其父俾出家依同郡嘉瑞寺偃上人尋祝髮受具一日闋華嚴經至惟一堅密身一切塵中現忽有省卽往見正叟心公于東林見別山智公于蔣山智問云近離何處師云江西智云馬大師安樂否師叉手進云起居和尚智命侍香師卽拂衣去見靈叟原公于焦山見斷橋倫公於淨慈倫問臨濟三遭黃檗痛棒是否師云



是又問因甚大愚脇下築拳師云得人一牛還人一馬倫願左右云再來人也倫示寂謂師曰吾必不起汝宜自勉師泣曰和尚滅度後當依誰倫曰柏山介石和尚妙喜三世孫其往依焉倫逝而介石適來補其處一日室中舉柏樹子話師方擬議石抗聲云何不道黃鶴樓前鸚鵡洲師言下頓悟卽延入侍司翌日陞堂白眾曰先師之道喜得人矣介石將終囑以宗門大事乃遺馳書於徑山偃豁聞公聞與語而契嘆曰介石雖往賴有吾侄在師歸廬山東巖日公在圓通請師分座眾五百人莫有契其機者九江守錢

公眞孫以禮聘師出世于西林辦香酬恩歸於介石  
國朝至元十二年取宋之師至江右居人咸避匿山  
谷問師獨晏坐一室軍士挾刃以臨之刃及頸問曰  
懼否師曰吾無生死有何懼乎軍士乃投刃而拜且  
遺師以白金師亦弗顧宅軍士皆驚服散去一境之  
內賴以無恐二十五年遷開先法會益盛名聞于上  
二十年被命遷東林東林大利而恆產素薄屋壞弗  
治師以所受施資置田若干畝葺殿堂門廡使之一  
新謂廬山以匡先生得名購寺傍道宮之地築室而  
禮祀焉元貞元年奉詔赴闕入對稱旨賜璽書號通

慧禪師并金襴法衣以榮其歸大德九年靈隱虛席  
行宣政院俾師主之師嘗勸一僧云微塵諸佛在你  
舌上三藏聖教在你腳底何不瞥地僧罔措師便喝  
又勸一僧云釋迦彌勒是他奴他是阿誰僧擬對師  
便打一僧新到師問何處來僧云閩中師云彼處佛  
法如何住持僧云饑卽喫飯困卽打睡師云錯僧云  
未審和尚此間如何住持師拂袖歸方丈僧休去其  
機鋒峻峭多此類居四歲而逝世壽七十五僧臘五  
十二四坐道場三十六年惟以紹隆祖道爲己任至  
於崇屋室以安其居廣土田以足其食皆末事耳得

法弟子東林住山宗廓等得度弟子慶哲暨希清等  
若干人有語錄若干卷行於諸方師自髫年受學于  
馮先生去非先生爲時宗工師熏炙之久間出緒餘  
施于世諦文字多奇作師嘗刻先生之文于東林後  
人遂以師之文並刻以傳始予徒玩師之文而敬慕  
焉茲覽狀所述乃見其深造自得卓焉過人坐鎮叢  
林何擔大事末後一着照映古今竊媿世之知師者  
淺也庸采狀所述序而銘之曰

惟通慧師一世偉人少遵魯諾長探竺墳遊戲如幻  
發爲至文曰是瑣瑣匪道所存朝夕咨訪直指心源

刊條落葉洞見本根乃受智印乃啓度門乃膺帝眷  
道譽彌尊陰注所及如彼大雲隨緣會散以返其真  
勿豐吾終厥有餘言罔極之報在其後昆金瓶寶篋  
巍巍眞身表以靈塔勒以貞珉飛聲焯實垂之無垠

元叟禪師塔銘

菩提達摩以摩訶迦葉所得無上正法來至中土直  
接上根其後支分爲二而心印獨付於曹溪派別爲  
五而宗風大振於臨濟至大慧而東南禪門之盛遂  
冠絕於一時故其子孫最爲蕃衍徑山元叟禪師大  
慧四世孫也師諱行端元叟蓋其字族臨海何氏世

爲儒家母教以論語孟子輒能成誦雅不欲汨沒於世儒章句之學十一從族叔父茂上人得度於餘杭之化成院十八受具戒一切文字不由師授自然能通而其器識淵邃夙負大志以斯道自任宴坐思維至忘寢食初參藏叟和尚於徑山問汝是甚處人師云台州叟便喝師展坐具叟又喝師收具叟云放汝三十棒參堂去師於言下豁然大悟一日侍次叟云我泉南無僧師云和尚嚮叟便棒師接住云莫道無僧好叟頷之卽延入侍司是時衆滿萬指莫有契其機者叟旣告寂師至淨慈依石鞏公卽處以記室相

與激揚此事與虛谷陵東嶼海晦機照東州永竹閣  
眞爲莫逆交尋以靈隱山水清勝往掛錫焉師嘗自  
稱寒拾里人橫川珙公在育王以偈招之曰寥寥天  
地間獨有寒山子師竟不度江而謁覺菴眞公於承  
天復參雪巖欽公於仰山巖問何處來師云兩浙巖  
云因其語言不同師云合取鼻孔巖云獼徑橋高集  
雲峰峻未識書記在師拍手云鴨吞螺螄眼睛突出  
巖笑顧謂侍者點好茶來卽送師歸蒙堂居三歲而  
巖逝乃還浙右虎崑伏公時住徑山請師居第一座  
旣而退處楞伽室擬寒山子百餘篇皆眞乘流注四

方稱子多傳誦之大德庚子出世湖之資福伏公加  
盛禮覬師唱其道師微笑而不答末後辦香卒歸于  
藏叟居五載學徒奔湊名聞京國至大特旨賜師號  
曰慧文正辨行宣政院尋舉師主中天竺師當久廢  
之餘爲樹門榜而正鄰刹之侵疆治殿宇而還叢林  
之舊觀延祐丙辰遷靈隱有旨設水陸大會於金山  
命師陞座說法竣事入覲於便殿從容奏對深契上  
衷加賜佛日普照之號陞辭南歸卽拂衣去養高於  
良渚之西菴至治壬戌徑山虛席三宗四眾咸謂非  
師莫能負荷其任相率白於行宣政院請師補其處



事聞於朝泰定甲子降璽書作大護持師至凡三被  
金襴袈裟之賜二十年間足不越閩而慕其道者鱗  
萃蟻集至無所容歲饑皆裹糲而來以得見爲幸徑  
山自大慧中興後代有名德得師而其道愈光師嘗  
勘一新到僧云何方聖者甚處靈祇僧云臨朕礎師  
曰杜撰禪和如麻似菽叅堂去又勘一僧云碁盤石  
斫破你腦門鉢盂池浸爛你腳板僧擬答師便喝又  
勘一僧云擘開華嶽連天秀放出黃河徹底清卽且  
置平實地上道將一句來僧擬開口師便打僧休去  
其機鋒峻峭多此類師以呵罵爲門弟子慈切之誨

以近人情行天下大公之道藏叟之的傳一人而已  
師之利他皆陰爲之沒齒不言而其道德聞望爲朝  
野所推服薦膺命賜人以爲榮而師未始自炫意漠  
如也暇日以餘力施於篇翰尤精絕古雅石田林先  
生隱居吳山不與世接獨遺師以詩曰能吟天寶句  
不廢嶺南禪其取重前輩如此師生於宋寶祐乙卯  
二月十六日以至正八月辛巳終於徑山之丈室世  
壽八十八僧臘七十六其先五日示微疾問侍僧云  
呼之會未休吸之尙未含試問請苦源來者不來者  
如何是來者不來者侍僧無語師良久云後五日看

越四日夜分沐浴更衣別眾趺坐書偈云本無生滅  
焉有去來冰河欲發鐵樹花開投筆垂一足而化龕  
留七日顏貌如生以是月某日奉全身窆於寂照塔  
院而分爪髮建塔於化城幻有精舍四會說法語有  
錄行於世所度弟子若干人嗣其法而同時闢化于  
吳楚閩越蜀漢間者若干人其上首靈隱法林中天  
竺祖銘等狀書行業俾潛書之茲碑潛忝從章甫逢  
掖之後未能於宗門中嗅薜蔔之香嘗醍醐之味罔  
知所以措其頌美之辭庸備著狀所述而銘諸庶幾  
不失其實來學得以瞻承夫遺範云爾銘曰

大雄唱滅宗途肇分不有單傳就開我人巍巍大慧  
垂陰四葉門庭之盛規重矩疊法雷普震裂地轟天  
據師子座四十二年被遇三朝便蕃異數王臣順風  
有巖外護大法棟梁一久而摧本無生滅焉有去來  
寂而常照碧潭秋月散爲千光非同非別徑山蒼蒼  
上與雲齊眞身常住大慧焉依贊述虛空非愚則惑  
直書具文刻此山石

碩揆和尚塔銘

國朝  
王澤弘

天童密雲悟公得法十二弟子而三峰爲最三峰漢  
月藏公得法十四弟子而徑山靈巖爲最徑山具德

禮公得法六十七弟子而靈隱爲最靈隱於諸兄弟  
如中條一峰秀出霞表卽今拈椎豎拂者徧天下棒  
喝錯互魔外橫行而師以一座當軒如雷發蟄如日  
馳照非惟震耀徑山之聲光卽三峰乘願崛興不惜  
觸犯忌諱起臨濟七百餘禩一絲九鼎之綱宗歷一  
紀二紀三四紀以迨於今求其繫以弗墜不得不以  
師爲中流砥柱矣師旣示寂之四年庚辰春弟子練  
忍二公遵遺命將歸塔靈隱徒步三千里至京師以  
狀乞銘嗚呼哲人徂謝末法艱危彼刹竿相望者寧  
復有聞直指堂塗毒鼓聲而死盡偷心移所寶惜歸

之無礙光者乎是則可慨也已師諱原志字碩揆鹽  
城孫氏子父陞字玉庭母趙生三子師其長也天性  
孝友不樂嬉戲稍長豪邁不可羈勒七歲就外塾塾  
師講大學致知格物語牽合師笑曰此曾子教人誠  
意一個方法耳不明則疑疑則誠意去疑得明非誠  
意不能也塾師大驚既而講毛詩凡書義兩騎處師  
出一語如斬綆絲舉座嘆服及其爲文滾滾不藉思  
索如夙構人皆以科名期之而不知其爲宿根乘願  
中人也師父玉庭公尙氣任俠以明末四方變亂結  
客梁宋齊魯間加意老成凡伍諸狙諸狙怒常欲死

公順治丁亥公卒爲諸狙所害師泣血遜荒數年而後得逞於仇手刃之迺還鄉里告祭父墓部置其母與弟得所然後辭去庚寅師年二十三至通州佛陀寺去氏祝髮師事元璽老宿未幾投靈隱具公受戒辛卯具公結制臯亭佛日寺師從參萬法歸一無夢無想二公案七日傍僧問威音王劫前如何是學人自己公曰麻三觔乾矢橛僧曰不會公曰初三十一中秋賞月師豁然有省因呈偈曰夜來消息枕頭傳報道火燒水底天喪盡毒龍哮石虎爪牙窠在萬人前具公深肯之自是橫機無讓法門有識之士莫不

嘉嘆矣己亥命居座元代公唱明三峰之學蹴踏龍  
象鼓鑄洪爐師握一竹篲勘辨方來未嘗不電激雷  
奔當之者震慄也康熙壬寅具公上堂手書付囑首  
提三峰爲溥沱正宗別開生面機先一句是汝諸人  
安身處先機一着是汝諸人立命處其間左右伸縮  
是汝諸人踏腳處末後一句是汝諸人出頭處此四  
則語於四卽一全一卽四乃楊岐之正脈隆祖之磕  
睡虎也三峰常云三十年後此話大行今碩座元悟  
處機語一一符合楊岐正脈斯得人矣是年師住揚  
州上方癸卯住泰興慶雲所至諸上善人莫不羅列



香花傾城爲供座下數千指環繞數萬眾一切典壞  
起廢不假思議而成皆若順風揚塵之易師過山水  
爲妙聲化樹木爲寶網東南法席未有盛於斯者也  
丁未具公示寂揚州之天寧寺戊申住徑山庚戌造  
塔徑山之夫開嶺奉藏具公衣鉢爪髮遂過靈巖候  
繼起儲公旣退靈巖喜而不寐顧謂西堂不菴眎曰  
碩姪知我喜則知我平日之憂也今見碩姪始終不  
與世心和合一意以從上法道爲己任千百年後知  
三峰老和尚有孫如此具兄有子如此退翁早不失  
卻一隻可喜也靈巖門下率多百尺竿頭更進一步

之人而期望於師乃如此則徑山囑付六十七人臨化獨諄諄在師者總皆以三峰全副擔荷楊岐正脈者委之也是年母年八十師買地梅谷靜室供養所謂正續道人也蓋先受戒具公法名濟燈云王子住三峰初進院聞靈巖訃上堂曰徑山先師見背小子痛哭哀毀不至滅性以吾靈巖猶在我先師同心同眼同佛口出之分身也思先師而不見見老人如見先師老人卯我翼我提獎我自不間於先師今何以報其深恩良久拊膺曰只有者一著隨顧眾曰會麼復拊膺曰更有何人知此心師以重興三峰爲己任

披肝瀝膽傾倒於清涼一席至則責負如山征徭似  
火墻不歲苦庫無宿積時師中寒病已七閱月扶杖  
蹙蹙四顧茫茫廡下數百眾無以餽其口不三日遠  
邇羸糧輕齋陸續力辦供眾之外以其羨爲修造資  
雖規模草創而氣象一新己未應鎮江五州之請庚  
申應揚州善慶之請辛酉住靈隱一切鼎新莊嚴整  
肅雲水如歸凡夙根道妙者靡不就其鑪錘丁卯師  
年六十和碩康親王命天來和尚捧衣鉢到山請師  
說戒一時戒子千餘人座前繞禮者幾三千餘眾焚  
香堵觀撫軍率官屬齋筵聽法咸謂具公五千衲子

下揚州惟師繼其盛已已

車駕南巡二月旣望

幸靈隱問答稱

旨賜

御書雲林二字

命易寺額

賜帑命二百兩當是時朝野歡騰而師以爲法門慶不自以爲喜也師住靈隱十二年辭院去緇素學留至於涕泣師皆不顧於是空三峰之人迎之境上師曰固老僧未了事也癸酉再住三峰蓋師之去三峰

已十四年矣山中地氣高寒風雨發作無時昔之修葺者今已圯壞師告於介眾叶於神謀身編厥務背負枿杵夏雨冬霜瘝膚灌頂師不避也舊者新之闕者補之惟大殿未成師猶憇焉丁丑師年七十師以四月十七日生誕彌之後殿前古樹忽斃一枝六月二十四日示微疾七月七日有白鶴東來盤旋飛舞由法堂轉方丈長唳數聲而去是晚師夢造林泉勝境樓臺殿閣儼古梵王利麗眉秀頂數百人請師說法遂陞座曰鳳翥九霄鵬生六合偶去偶來有何儀式心向何生性成何色遂拈香云日月有窮天地無

極寤卽舉似開顯等亦不知其木壞山頽之讖也七  
月中元午刻沐浴更衣說偈偈曰昨欲行時月不圓  
今遲一日月嬋娟從今要見三峰面劈破乾坤作兩  
邊書訖開顯等又問封龕舉火誰屬復索筆書曰三  
峰之龕誰敢來封若不封卻宗說何通大書八字貼  
在當中當中當中久坐無功萬仞峰頭行大道增一  
把火看真龍書訖過筆與侍者坐脫而去世壽七十  
法臘四十七遺命歸塔靈隱師前後開法三十六年  
八住道場鍛鍊學徒真誠愷切說法自關谿徑如蜀  
道初開如泰山日出不求合古法皆自與古法合非

復千百世之眼目非灼然足當楊岐正脈未有能挽  
回末法者也仕宦至其地者餐風味道造請無虛席  
寶坊所坐川搖嶽震有自來也梓行八會語錄雜著  
尺牘詩偈如千卷借巢集詩篇自吐胸臆論者謂在  
寒山栢堂間翰墨似顏平原握拳透爪師皆不以措  
意也嗣法弟子指薪溥隱嵩顯燈傳暉攝水月宗楷  
證爾嶽湖練飛量雙乾勤蒼際隆指梅問夢持鑑自  
諾惺忍修梁嵩巖耀青雷震崑潮發脫三賢雪舟度  
明巖照逸岸融笑拈印轉菴正在鈞埏川回望七來  
寶根受潤鯤化誠確三傳雪蒼遇七來復凡三十人

剃度弟子開和開如等若干人暨得戒弟子萬數師  
氣宇高朗襟度等夷坦無邱陵不立崖岸其於祖父  
一言一語不敢背違路馬許田不少借假持身衛道  
如冰履霜而愈堅如金煅火而愈栗蒙眾誚而不恤  
犯眾怒而不顧諍所當諍辨所當辨孤行獨往雖賁  
育不能奪矣不菴嘗與師書曰山頭老師曰吾兄不  
求合於古而自無不合於古是真實語是滿腹語是  
沒定語從其口出者不敢於語外復置一念惟默而  
祝曰凡今之得座披衣號爲人天師者無問先一葉  
同一葉後一葉及二葉三葉以至多葉如是如是不



獨滄沱之統持以不墜卽諸宗亦多榮藉之幸不菴  
靈巖高第一杖遠引罵盡一世惟於師深所心折由  
斯觀之卽師之生平可知矣比二公來乞銘而不菴  
亦已化去金湯無人誰爲楮柱俛仰法門嗚呼是真  
可慨也已銘曰

徑山之子三峰之孫楊岐正脈終古乾坤心心相契  
一線無痕三十三世道行彌尊寶坊高踞緇素雲屯  
挽回末法電掣雷奔茫茫溟渤嶽嶽崑崙維水有源  
維山有根如星中月如風中旛冷暖自知何恤人言  
悠悠螭蛄十里聲喧龍豈羣遊鳳實孤騫歸骨越山

藏鉢吳門亡則俱亡存則俱存三十弟子誰報師恩

諦暉和尚塔銘

張 暈

達磨西來不立文字廓然無聖脫屣生死其生也無法爲法其死也不宜有銘雖然不宜有銘法也無法爲法則亦可銘和尚諱慧輅以明天啟七年丁卯十月初八日得四大於吳興金田沈氏父濟母李以雍正三年乙巳三月二十日舍四大於錢塘雲林古靈隱寺春秋九十有九僧臘七十有四余與和尚潛遠之契垂三十年乙巳三月十一日夜示夢余從京師走書江南告弟奕山曰和尚將入涅槃地矣果以是

日示疾預指二十日午時爲報年之限及期命鳴鐘  
自升繩床趺坐點首三而滅遺命坐三日入龕門人  
智廣等以佛法斂丙午九月十三日于飛來峰側起  
塔安神和尚秀眉大耳步律音鐘六歲而孤家碎於  
役及母李終乃檀那身命自拔人間遍參諸方以求  
止泊順治己丑二月遊學至靈隱禮具德和尚一日  
拜直指堂下仰見直指二字憬然曰彼以直指我以  
直會又聞戶外鳥噉聲一時大千俱直時具德和尚  
弟子五千人碩德圓戒林植山官而師以年少依位  
而立寶身突兀常住不遷乃嗣法焉厯住興福妙濟

師林天竺龍井諸寺終於靈隱初

聖祖仁皇帝賜寺額曰雲林因爲雲林寺後

南巡輒舉

賜和尚

御書曰禪門法紀又別

賜御書黃金佛像白金等物和尙三身八勝而六時一  
眞露地白牛無得無捨常造余竺西草堂行梅花下  
花千餘樹如雪香動心魂和尙行未嘗一仰視至草  
堂坐謂侍僧曰聞梅花香乎曰聞曰爾等看花去及  
返終亦不視九十後便不酬不對一以師子音接十

方佛當機者不喻則曰和尚蓋矣語不可曉偶落六通則曰和尚昔云然今果然銘曰

醍醐味醯蒼蔔香衰斑其相紛羊啞狐哈和尚智度七十四年縣解尻首草腐人天一佛既無干佛乃有演暢宗極下足撒手峰背飛來師今飛去無去無來導師常住

祭佛照禪師文

宋釋居簡

嘉泰三年三月二十八四川兩浙兩廣七閩江淮東西荆湖南北叅學比丘某與諸比丘眾注香煮茶奉微供于鄧之東菴佛照禪師拙菴大和尚之靈於戲

師之所自立亦難矣哉方其升應菴之堂則登東山而小魯晚入雙徑之室然後登泰山而小天下妄庸醜正敵羣困折不可奈何而後已卒能橫翔捷出縛虎兇鞭龍象搏扶搖跨閭闔阜陵英主也曰兢兢業業當如禪師之言史真隱帝者師也謂其氣雄萬夫陸放翁山陰耆舊也贊其話行四海非有大過人一聖二賢易以若此他日行輩鼎立更迭而逝師則歸然獨殿諸老紛紛晚進競爭春妍秋新露零一掃而盡於是時也方擘阨之木蘭洲之宿莽凌霜厲雪以自怡收卷波瀾一菴至樂忍死不敢寔居逸體今亡

矣夫昧者謂其果亡矣有法門名無盡燈冥者皆明  
明終不盡則師常在而不亡尙何悲焉

祭元叟和尚文

元  
釋大訢

公與先師齊驅宋季潛子器之震動一世後七十年  
惟公獨在趙州汾陽高出行輩如見先師床下受拜  
策我鶩蹇箴我狂隘我來金陵不阻書誨我眷茲山  
翠華所屆倚公之重雄冠海岱累請於朝待命不至  
胡以訃聞德音未沫濟北之宗藐焉孤寄承乏何人  
化爲異類所恃惟公庶幾知畏公復往矣而我何恃  
如舉九鼎昇之孺稚胡力之任不顧以躓就云潢潦

可接巨派孰云焦壤可沃霈霈猶不遐遺置我鑪錘  
有赫其靈光吐虹霓尙聆後訓霆烈飈厲平生幾何  
萬古長喟吾宗是慟匪私我涕



雲林寺志卷五終